

# 古柏行

唐·杜甫

孔明庙前有老柏，柯如青铜根如石。  
霜皮溜雨四十围，黛色参天二千尺。  
君臣已与时际会，树木犹为人爱惜。  
云来气接巫峡长，月出寒通雪山白。  
忆昨路绕锦亭东，先主武侯同閼宫。  
崔嵬枝干郊原古，窈窕丹青户牖空。  
落落盘踞虽得地，冥冥孤高多烈风。  
扶持自是神明力，正直原因造化功。  
大厦如倾要梁栋，万牛回首丘山重。  
不露文章世已惊，未辞翦伐谁能送？  
苦心岂免容蝼蚁，香叶终经宿鸾凤。  
志士幽人莫怨嗟：古来材大难为用。